



Da Franz Nager (dretg), il cumandant da la brigada, ha Lorenzo Rampa retschet la medaglia d'onur per sia gronda lavur a favur da la brigada.



Cusseglier guvernativ Christian Rathgeb (san.) cun Walter Schlegel, il cumandant da la polizia chantunala.



Il Lumnezian Damian Casanova (san.) e cumandant dal Battagliun d'infanteria 77 cun divisiunari Marco Cantieni, il cumandant da la Territorialregiun 3.



Er vesì a l'occorrenza: Duri Campell, il president dal cussegl grond. Qua cun Max Leuener, il president da la vischnanca da Maiavilla.



Brigadier Lucas Caduff è er stà al rapport da la brigada.



Las duas deputadas Elita Florin-Caluori e Brigitta Hitz (da san.) cun André Blattmann, il schef da l'armada svizra.

FOTOS G. N. STGIER

«Ina buna armaziun è indispensabla»

Rapport da la Brigada d'infanteria da muntogna 12

DA GION NUTEGN STGIER / ANR

■ A la fin dal 2016 è la brigada per adina istorgia. L'armada dentant, quella resta sche er be cun in dumber da 100 000 schuldads. Cun paucas excepziuns è il cumandant da la brigada stà cuntent l'onn passà cun la lavur da ses umens. Dapi il 2004 exista la Brigada d'infanteria da muntogna 12 ed a partir dal 2012 è brigadier Franz Nager il cumandant da quella. El vegn er ad esser l'ultim cumandant da la brigada cun in dumber da 7000 schuldads. Cun il svilup da l'armada va l'istorgia da quella trupa a fin e quai cun la midada da l'onn 2016/17. Ina buna part dals schuldads vegn suenter a far ses serevtsch militar en la Brigada mecanisada 11. Quella vegn a midar sia sedia principala da Winterthur a Cuira. Per il Grischun saja quai da gronda muntada, ha alura ditg cusseglier guvernativ Christian Rathgeb als 700 uffiziers e numerus giasts dal militar, da la politica e da l'economia a chaschun da ses pled tar il rapport annual da la brigada. Ils Grischuns hajan ina relaziun singulara cun quella, dentant il spiert da quella vivia vinavant tar la schuldada grischuna. Cuntent è il schef dal departament da giustia, segirezza e sanadad er ch'il davos onn ed er il 2015 presta la

gronda part dals sis battagliuns da la Brigada d'infanteria da muntogna 12 ses curs da repetiziun en il Grischun.

Meglierar il servetsch da guardia

Cun paucas excepziuns hajan ils 7000 schuldads inlcus lur uffiziers ademplì il pensum, ha ditg Franz Nager, il cumandant da la Brigada d'infanteria da muntogna 12. Tar sias visitas tar las truppas haja el vesì schuldada motivada e cuntent cun buna disciplina en cumparaziun cun l'onn precedent. Betg uschè cuntent è il brigadier da Lucerna cun il servetsch da guardia. En quella chausa pretendia Franz Nager dapli responsabladad e seriusadad da schuldads ed uffiziers. Er quai che pertutga la perdita da material vesa il cumandant in grond meglierament e quai tar tuts sis battagliuns da la brigada. Per tuts 7000 schuldads stat er da preschent sin il program in marsch da 20 km sco già l'onn passà. Urden, disciplina e segirezza, quai saja per mintga schuldà ed uffizier ina obligaziun. Per ils uffiziers valia anc adina: cumandar, controllar e curreger. Ultra da quai vul Franz Nager introducir per tuts ina scolaziun supplementara cun diesch divers temas che duaian esser la basa per il success da la gruppa, da la partiziun ubain da la cumpagnia.

Losch da nossa armada

Onur a la raspada militar ed als blers preschents ha fatg cun sia preschientscha il cumandant da corp e schef da l'armada André Blattmann. El saja losch da tut quai che la schuldada prestia e quai valia er per uffiziers e schuldads da la Brigada d'infanteria da muntogna 12, ha ditg il giast da Berna. «Nus dastgain esser loschs da nossa armada da milissa», ha ditg André Blattmann cun plaschair. La rait naziunala da segirezza funcziunaria fitg bain, ha menziunà il schef da l'armada svizra. En il temp dad oz, cun tants attentats terroristics saja ina infanteria cun bunas qualificaziuns ed a curta vista abla d'agir da gronda muntada e quai er per la Svizra. Ultra da quai segna l'armada er adina per la segirezza tar occurrenzas internaziunales sco il Forum mundial d'economia a Tavau u tar auters inscuters da la predominanza politica da l'entir mund en Svizra. Dad avair ina armada cun ina buna armaziun saja indispensabel ed en quella chausa saja er vinavant da far investziuns, ha ditg André Blattmann. Per ademplir las sfidas, rearmar la trupa e per ina buna scolaziun da la schuldada sajan las tschintg milliardas francs che l'armada custa en in onn ina summa bain investida.



Er quest onn stattan sin il program per ils schuldads da la Brigada d'infanteria da muntogna 12 intgins exerchezis.